

循化志

卷之二

山川

關津

古蹟

城池

循化志卷之二

閩中海峯龔景瀚編

金臺星泉李本源校

山川

小積石山在廳治之北不及里黃河北岸嶙峋峭拔全體皆石迤邐東去約六七十里黃河行山麓之南南趨土門墩折而北傍山行過起臺溝口南岸亦有石山東之所謂兩山如削河流經其中也至積石關始出峽

循化志

卷二 山川

一

按此山卽水經注之唐述山也唐人謂之小積石山章懷太子後漢書注杜氏通典及元人河源志皆誤以爲禹貢積石者也在北岸爲西甯府巴燕戎格廳境以其爲循化主山且近故首及之

河北有層山山甚靈秀山峯之上立石數百丈亭亭傑豎競勢爭高遠望嶮嶮若攢圖之託霄上其下層巖峭舉壁岸無階懸巖之中多石室焉室中若有積卷而世士罕有津達者因謂之積書巖巖

堂之內每時見神人往還蓋鶴衣羽裳之士煉精  
餌食之夫耳俗人不悟其仙乃謂之神鬼彼羌曰  
鬼曰唐述復因名之爲唐述山指其堂密之居謂  
之唐述窟其懷道宗元之士皮冠淨髮之徒亦往  
棲託焉故秦川記曰河峽崖傍有二窟一曰唐述  
窟高四十丈西二里有時亮窟高百丈廣二十丈  
深三十丈藏古書五笥亮南安人也下封有水導  
自是山溪水南注河謂之唐述水

水經注

小積石山在枹罕縣西北七十里

括地志一  
統志引

循化志

卷二 山川

二

魏王泰曰大積石山在吐谷渾界小積石山在枹  
罕縣西北

禹貢錐指

張守節曰河自鹽澤潛行入吐谷渾界大積石山

又東北流至小積石山

禹貢錐指

積石山一名唐述山今名小積石山在枹罕縣西  
北七十里按河出積石山在西南羌中注於蒲昌  
海潛行地下出於積石爲中國河故今人目彼山  
爲大積石此山爲小積石 積石山在龍支縣西  
九十八里南與河州枹罕縣分界

元和郡縣志

積石山在河州西北接西甯界亦曰小積石山本古唐述山也禹貢導河之積石山本在徼外自唐以靜邊城置積石軍始移其名於唐述然唐人尚不誤元人竟以大積石山爲崑崙遂誤以小積石山爲禹貢之積石 一統志

積石山在河州西北一百二十里西臨番界兩山如削河流經其中 府志

黃河東北經積石山南阿木你大拉加山積石關之北北岸入西甯東南邊外界南岸入河州內西

循化志

卷二 山川

三

北界此唐宋以來所名之積石也卽古唐述山亦曰小積石西十四度極三十六度計西南夫大積石五百餘里 水道提綱

按積石山在積石關西六十里唐宋之名軍金元之名州明之名關皆遙取山名名之以關北對岸之山亦積石之支也然連山六七十里皆不如廳治北面者之高大故當以此爲主名今俗忸積石關之名相傳已久遂以積石關之山爲積石山而此之名反隱不知

積石關在河南積石山在河北積石關之山  
自名阿木你達拉加山不可合爲一黃河先  
過積石山後至積石關齊氏叙次秩然不容  
混也

又按唐枹罕縣今河州卽以積石關爲積石  
山距河州一百二十里非七十里若於關內  
求之則黃河之北并無大山且皆土山非石  
山括地志及元和志皆誤也閻百詩曰積石  
山在河州西北七十里積石關則又在西北

循化志

卷二 山川

四

一百二十里此知積石山與積石關爲二而  
誤以西爲東遂謂積石山反在積石關之內  
不知積石關在河州西北一百二十里積石  
山在河州西北一百八十里其誤與二志同  
阿木你達拉加山在孟達工東廳治東北六十里卽  
積石關之山也

按齊氏說已見上今俗誤以此爲積石山

白石山在河州城南百里河州之主山也廳治東南  
約二百數十里宋時謂之露骨山今俗曰太子山冬

夏頂積雪亦曰雪山石骨傑出高入雲表數百里外皆望見之其山起伏蜿蜒由東而西而北直抵積石關北入於河明設二十四關皆因此山崖谷爲之關內河州境關外番界爲廳境石門山打兒架山阿木你達拉加山皆此一山也

金城郡白石縣應劭曰白石山在東

漢書地理志

按縣以山名故城當在今雙城堡左右灘水出白石縣塞外亦曰白石河亦以此名

宋熙甯六年木征據河州王韶克之穿露骨山南

循化志

卷二 山川

五

入洮州境山徑陡峻狹隘釋馬徒行

河州志

石門山在河州西九十里廳治東南約一百九十里卽土門關也兩山中斷灘水自口外廳境流八關爲河州界

灘水又東北流徑石門口山高險峻絕對岸若門故峽得厥名矣疑卽臯蘭山門也漢武帝元狩三年驃騎霍去病出隴西至臯蘭謂是山之關塞也應劭漢書音義臯蘭在隴西白石縣塞外河名也孟康曰山關名也今是山去河不遠故論者疑自

河山之間矣 水經注

按此則皋蘭山當在此而後世之以蘭州五泉山爲皋蘭山且以名州名縣者皆誤矣考漢書霍去病傳轉戰六日過焉支山千有餘里合短兵鏖皋蘭下顏師古注山名也不言其處應劭以爲白石縣塞外蓋與酈注合但以爲河名則失之矣是皋蘭尚在焉支山西北千有餘里而酈注猶以此爲太近故疑而未敢定而今乃以漢金城縣之山當之更爲

循化志

卷二 山川

六

失實水經注之梁泉水卽五泉也叙金城河并無皋蘭之名其誤蓋始於隋時

打兒架山在老鴉關西二十里廳治東南九十里河州至廳大路所經也自盤坡根上坡十里始陟其頂每下方雨則山上常作雪其巔有罡風傷人行者必疾趨數步過之山中多野花四五月開時五色班然爛如雲錦

按此山北連積石關南連土門關以至太子山實皆一山內外之界限也

料東山在火力藏寨廳治南二百五十五里有樹木  
觀音山在火力藏寨廳治南二百里有樹木

阿米脫綻山在下則蓋寨廳治南三百三十里土山  
多草

塞木力山在哈家寨廳治南三百三十里有小林

泥什山在哈家寨廳治南三百三十里有小林

按廳卷沈觀察青崖稟中云夏秋番人上撮  
喀山避暑撮喀山當亦在哈家寨不知卽此

二山之異名抑別一山俟考

循化志

卷二 山川

七

宗務山在下龍布寨廳治西八十里下臨黃河所謂

宗務峽也山廣博林木茂盛自建循化城凡有興  
作木植皆資於此城內外人日用材薪亦取給焉

浮河作筏順流而下高一二丈圍皆三四寸許豎  
實不浮斧以斯之悉供爨火移之內地皆屋材也

撤弄山在旦郡莊廳治西八十里林木亦盛

元固山在查汗大寺工廳治西六十里有小林

大石山在和洛那寨廳治西南一百五十里林木茂  
盛有扎什其寺



烟墩山在保安堡東廳治西南一百二十里土山多草

蓮花山在保安堡西南廳治西南一百三十里土山多草

雙朋山在阿巴喇寨廳治西南一百六十里有樹木  
迨赫弄山在加卧寨廳治西南一百六十里有樹木  
多力山在加卧寨廳治西南一百六十里林木茂盛  
有卡錯寺

角木山在錯勿日寨廳治西南一百七十里有小林

循化志

卷二 山川

八

速古山在沙卜浪寨廳治西南一百八十里林木茂盛  
盛有葉冲寺

達任山在多巴塞廳治西南一百八十里林木茂盛  
有達任寺

旦布山在多巴塞廳治西南一百八十里林木茂盛  
山溝有溫泉五六番人多就浴焉有疾則飲此水

按自料東山以下皆未及躬履其地圖籍亦  
無所考詢各寨歇家而錄之名實或不無錯  
誤當徐爲訪核

黃河自貴德廳境西來入宗務峽保安大河南來注之河北皆西甯巴燕戎格廳境河南則廳屬之上隆布番寨地也東徑查汗大寺工北又徑蘓只工北至掌教坊渡口又徑查家工北邊都溝水南來注之又徑街子工北又徑循化廳治北河源廟在南屏南至土門墩折而北傍積石山下行徑清水工北起臺溝水南來注之入峽徑孟達工北至木廠塘入積石關出峽爲河州境河北則廳屬之靈藏鴻化二族地也自宗務峽至積石關凡一百四

循化志

卷二 山川

九

十里

河水又東過隴西河關縣北水經地理志曰漢宣帝神爵二年置河關縣蓋取河之關塞也河水又東北流入西平郡界左合二川南流入河又東北濟川水注之又東徑澆河故城北有二城東西角倚東北去西平二百二十里又東北徑黃川城又東徑石城南左合北谷水又東北徑黃河城南西北去西平二百一十七里又東北徑廣違城北右合烏頭川水又東徑邯川城南又東臨津溪水注

之又東徑臨津城北白土城南十三州志日左南  
津西六十里有白土城城在大河之北而爲緣河  
濟渡之處又東左會白土川水又東北會兩川右合  
二水參差夾崖連壤負險相望河北有層山水經注  
按自河關縣以下皆今貴德循化二廳境也  
澆河城等地今不能實指其處無可分界故  
並錄之然今黃河在貴德境皆東北流在循  
化境皆東流則自廣遠城以下當爲廳境其  
白土城疑卽今西甯甘都堂汛也自循化至

西甯皆由掌教坊渡口過河至甘都堂所謂  
緣河濟渡也右合二水豈卽邊都起臺二溝  
歟河北層山所謂唐述山今廳城北之小積  
石山是也

黃河入河州歸德堡界四十里有枯枯塞河自南  
來注之又東五十里有火涿藍河自南來注之又  
東北有烏藍布拉克河西北自青海南境來注之  
又東北有野雀峽河自南來注之又東北百里至  
蘇魯古山南折而東南流八十里有姑楚河自南

來注之又東南流五十餘里折東北流百餘里又東南流有小水西南來注之又折而東北經積石山南阿木你達拉加山積石關之外北岸入西甯東南邊外界南岸入河州內西北界自入歸德堡邊始名黃河黃河東北經積石山南長甯驛北水

道提綱

按枯枯塞河火涿藍河烏藍布拉克河皆在貴德廳境也巧雀匣河卽保安大河也以其經野雀峽故亦曰野雀峽河齊氏訛以爲巧

循化志

卷二 山川

十一

雀匣河蘇魯古山疑卽素占山亦曰速古山保安河源所出也但其山在南河水經其北不得云南且距黃河甚遠枯楚河疑卽邊都溝所云小水疑帥起臺溝自保安河以東積石關以西水自南來入河者惟此二水而已又自馬石多峽保安入黃河處至積石關僅一百四十里而齊氏所數乃有三百餘里亦誤

保安大河亦曰野雀峽河源出於廳屬合兒番寨之

素古山北流經野雀峽塘東龍布寺東吳屯西季屯東李屯東保安城西脫屯西有哈麻溝水自東南注之至上龍布寨羣務莊東恩沾木河水東南來注之至古隆莊西清水河西南來注之至馬石多峽口入黃河長三百里

野雀峽河水出保安堡東南境西北流一百五十里入黃河水道提綱

按此水源出保安西南非東南齊氏蓋誤以恩沾木河爲此水之源故里數亦較短

循化志

卷二 山川

十二

清水河源出於貴德廳界之素古山經火納坪塘之西至古隆莊西南入保安大河長二百七十里

按素古山連亘保安西南其山甚大故此水與保安河同出此山雖一山而實兩地也乾隆三年割歸德屬西甯以此水爲界河西北歸德界河東南保安界

恩沾木河源出於廳屬加卧番寨之加撤山其上流曰郎家溝經郎家莊西南恩沾木莊西南至土龍布寨羣務莊南入保安大河長八十里

哈麻溝水源出於廳屬鐵布番寨之什達隆山經保安城西至脫屯西入保安大河長六十里天旱則無水邊都溝其源曰隆只黑泉流四十里至查家工東會純義溝水經街子工西皆引爲渠漑田轉磨至沙坡塘西入黃河長八十五里

按此水卽齊氏所謂始楚河也

姑楚河出古爾板拖羅海山南麓東南流折而北又折西北而東北流入黃河

水道提綱

純義溝其源曰郭茂泉一眼北流合郭隆泉至查家

循化志

卷二 由川

十三

工入邊都溝長二十五里

郭隆小泉入純義溝長五里

中庫溝其源曰恰布欠泉西北流合撒茂泉至查家工入邊都溝長七十里

撒茂泉入中庫溝長十里

起臺溝其源曰沙東隆哇泉流經起臺堡西南章哈工西合夕厥溝水至清水工西入黃河長九十里亦多引爲渠漑田轉磨

按此水卽齊氏所謂小水西南來注之者也

甯巴溝亂泉入起臺溝長八里

夕厰溝亂泉經夕厰工至章哈工入起臺溝長五十里

灑水今俗誤呼爲大夏河者也其源始曰達那河出於廳治西南之蒙古界經拉卜楞寺一百五十里至上南拉寨咱又河自西南下哈家河自東南合流來注之乃曰噶河至橋溝寺曰橋溝河且隆河北來注之遂入土門關曰大夏河入河州境自上南拉寨至土門關一百二十里灑水在廳境凡二

循化志

卷二 山川

十四

百七十里

金城郡白石縣灑水出西塞外東至枹罕入河

漢書

地理志

灑水導源塞外羌中故地理志曰其水出西塞外東北流歷野虜中徑消銅城西又東北徑列城東考地說無自蓋出自戎方矣左合列水水出西北溪東北流徑列城北右入灑水城居二水之會也灑水又北徑可石孤城西西戎之名也又東北右合黑城溪水水出西北山下東南流徑黑城南又東

南枝水左出焉又東南入灘水灘水又東北徑榆城東榆城溪水注之水出素和細越西北山下東南流徑細越川夷俗鄉名也又東南出狄周峽東南右合黑城溪之枝津津水上承溪水東北徑黑城東東北注之榆溪又東南徑榆城南東北注灘水灘水又東北徑石門口山高險峻絕對岸若門故峽得厥名矣疑卽臯蘭山門也漢武帝元狩三年驃騎霍去病出隴西至臯蘭謂是山之關塞也灘水又東北臯蘭山水自山左右翼注灘水水經注

按石門口山卽土門關也土門關以內爲河州境故酈注所叙不具錄灘水經廳境其地曰捏貢川亦曰甘家川地平曠東西南北皆可百餘里故城築爲多所云消銅城列成筭今雖不得其處然川中有兩古城遺址猶存一曰騙馬城一曰八角城未知建於何時其卽酈注所云諸城之遺乎灘水在廳境所合三水曰咱又河下哈家河且隆河而酈注所叙亦有三水曰列水黑城溪水榆城溪水數



邊相當但所云左右東西地勢不同耳古今異形亦不敢一一強爲比附也

鳳林縣東南至河州八十里石門山在縣東北二十里灘水西去縣二百步大夏縣西北至河州七十里大夏川水經縣南去縣十步

元和郡縣志

按此則灘水與大夏水明爲兩水不得混而爲一也又考水經注大夏川水入洮不入河今灘水自河州之北入河與洮水無涉其非大夏河明矣大夏水當爲今河州甯河鎮之

循化志

卷二 山川

十六

水自沙麻關來者由太子寺至狄道境入洮今呼爲廣通河是也又考鳳林縣在河州西南志云東南至州當云東北傳寫之訛也

大夏河卽古灘水又名白石河源出西南邊外打城達巴罕山之南東流二百五十里南合小水一又東五十餘里南合小水一又東北有二水自西北合流來注之又北流有五普威河自東南來會折西北流四十里有小水自西來會又北流六十里北受一小水折而東北流入邊界大夏堡北

水道提綱

按齊氏亦仍俗誤故曰大夏河卽灘水所錄受七小水與今不合齊氏去今未久不應有變遷蓋未履其地僅據傳聞故耳入邊之堡曰雙城堡無大夏之名齊氏又謂廣通河入灘水今考廣通河卽古大夏水今甯河鎮至太子寺之河是也入洮不入灘齊氏誤以爲入灘故合二水爲一水歟

灘水在河州南自番界流入明統志謂之大夏河在州南三里冊說大夏河去州五里源出邊外由土

循化志

卷二 山川

十七

門槐樹老鴉三關入境經州南折北流入河又牛脊河在州西南十里源亦出邊外由喬家岔關入境東北入大夏河又洪水河源出大溝河流經州南門外又東入大夏河又廣通河在州東南六十里甯河城西北流入大夏河按古大夏水入洮此水入河乃灘水也自明統志訛爲大夏河又云灘水在蘭州東南十五里諸志從之皆誤又考輿圖此水在邊外名阿拉藏河東流會五六小水行四百餘里始折東北入州境與水經注合今土人

皆名爲大夏河不知爲灘水矣 一統志

按統志之辨是也冊說云廣通河入灘誤與齊氏同

咱又河源出於咱又寨碛中流九十里將上南拉寨與下哈家河會同注達那河曰噶河

下哈家河源出於洮州廳番界經廳屬下哈家寨六十里將至上南拉寨與咱又河會同注達那河曰噶河

且隆河源出於打兒架山南麓溝中亂泉流六十里循化志 卷二 山川 十八

至橋溝寺入噶河曰橋溝河

捏貢川卽甘家川在廳治南二百里東西一百三十里南北約一百里其水灘水也

丙兔子真相移駐莽刺川火落赤移駐捏工川逼近西甯日蠶食番族 明史西甯傳

按捏工川卽捏貢川音之變也

又按薛千總云其地寬平約數千頃舊時耕種之跡畛畦隱隱可見城址尚存周圍可八九里前此曾議開墾而中止廳卷不詳徐叅

戎以營卷見示始悉本未然其後亦未具也  
今姑撮錄之

乾隆六年二月兵部侍郎鄂 奏甘省河州地方  
八角城之捏貢川可墾荒地甚多臣前任陝督時  
曾委循化遊擊胡璉河州知州劉鶴鳴查勘據稟  
查過可懇之田約數千頃開唐宋元明俱經屯種  
內有大河三道引水渠跡宛在因日久損壞復加  
挑濬即可灌溉彼時臣已離任未經核査請行伏  
祈

循化志

卷二 山川

十九

皇上勅該督撫委員詳勘或令兵屯或照柳林屯之例  
辦理將來甘肅一帶可望漸次充積矣

營卷

八月河州知州吳 詳捏貢一川在州境西南土  
門關口之外離關門約二百里悉係向化等六族  
牧放番地屬河州廳所轄每年納番糧七十餘石  
其地南北徑長三十餘里東西橫濶二三里至七  
八里不等川原山麓高下不齊沙土滋泥肥磽各  
別滋泥似可開墾沙土殊難預期川原可望收成  
山麓恐多乾旱而滋泥沙土各半川原十分之一

近川水有三股分引之處閒存渠跡詢之番目據稱前曾開墾下籽一斗約收六七斗不等因地氣寒冷霜降天早難以全熟是以停止伏查捏貢川地實繁多但來水三道其勢微細山地居多不能全數引灌今就開墾而論川地下籽每畝約一倉斗旱地約八升每牛一隻犁水地三十餘畝旱地四十餘畝可墾地畝統計二千頃每畝籽種以九升合算每歲用籽糧一萬八千餘石牛以每隻犁四十畝合算約需耕牛五千餘隻每牛一隻約價

十兩共需牛價銀五萬餘兩每牛一隻加農具銀一兩約加銀五千餘兩合共需銀七萬三千餘兩墾戶口糧每頃二人每人每日給銀六分約須墾戶四千餘人一歲又需銀八萬五千餘兩約共需銀十五萬八千餘兩至開渠工費督率員役養廉工食及墾戶屋宇尚須另行勘估每歲收獲糧石水旱地統以下籽一斗收六斗合算歲收糧十萬餘石除籽粒照例平分約收糧四萬餘石似足充輸兵餉惟是塞外地高土冷寒霜早降必須試種

方知收糧及頃畝確數且此項地畝均屬番地自本朝以來番族且他爾家花爾旦等牧放牲畜以資衣食生聚甚繁從前招中茶馬今則承納番糧猶內地漢民也墾種之日若羣聚雜處必不相安若驅而遠之不無失所之歎况州屬二十四關以外番人計一十九族若非設營駐兵彈壓番性刁悍不免多事而設兵屯墾需費更繁似於國計民生無甚裨益

營卷

按此地惟向化一族非六族也十九族惟向

循化志

卷二 山川

二十一

化撒喇二族在關外其餘皆在關內今云關外番人一十九族亦非

七年二月叅革軍需道沈青崖稟竊奉部行河州捏貢川開墾檄令勘議青崖稔悉該川土性水泉實可佈種仰墾俯念青崖因公獲譴准照原任潼商道王全臣屯墾之例親往屯所試種一年以察天時地力情愿牛具口糧一切不費

國帑俟有成效漸加擴充收獲交倉估撥兵糧等情於乾隆六年十一月具呈未蒙批示旋蒙再飭委

員確勘柰委勘者戒於從前柳林三清等處屯田  
地方官俱罹叅處先懷成見一味畏葸疑慮如隕  
霜之早晚不因川原高下况自且隆溝上坡至黑  
溝下坡一上一下各十餘里其高低正復相等不  
得謂捏貢之地獨高又聞各番或云三月開凍七  
月降霜恐種植難成查先委河州吳牧詳稍前曾  
開墾下籽一斗約收六七斗不等則知彼地氣候  
寒暖不齊秋糧難熟而青稞大麥三月播種六月  
牧成一百二十日固寬然可成熟也至八角騙馬

等城之旁地廣番稀乃民戶鮮少之故非因霜殺  
驅而聚於土門關外卽如八角城對河有地一區  
番人耕熟繪入圖內何以獨不早霜至於招戶廬  
舍牛具口糧誠爲浩繁但屯利官出工本者全係  
官收民戶借官工本者三年扣還仍與平分而吳  
牧滿估官給工本又與農民平分宜其所收不敷  
所費况今不領帑項試辦則費多收少似不必鯁  
鯁過計也又查番戶聚族搭蓋土房俱在太陽清  
水等溝耕種大川中牧戶甚少夏秋旣上撮喀山

避暑冬月未墾之地儘可牧放不必別有安置現  
經花而旦等五族衆口一詞俱願內地民人開墾  
具有番狀在案未識曾否轉賚從前柳林湖初勘  
時委鎮番令杜蔭查驗亦因係賀蘭山蒙古牧地  
極言不便迨蔣侍郎違衆行之遂興大利今該川  
如係番民熟地據而有之驅逐遠去斯爲競利生  
釁不知開地之中卽寓撫番之道不特無礙而

聖朝德化覃敷益遠矣 陝甘總督尹批沈青崖欠帑

未清固不便准其屯墾但據呈捏貢川宜於屯種

循化志

卷二 山川

二十三

花而旦五族情愿民人前往開墾且有番狀與該  
司委勘詳議迥異是否地方官畏難規避仰蘭州  
布政司查實具報 蘭州府知府宋安仁查勘得  
捏貢川三月開凍七月降霜種植亦難成熟且係  
各番族牧放牲畜之所一經開墾野性未馴致生  
事端似無庸開墾以省糜費以免擾累 批遵照  
另批示再行確查 營卷

按此案歸結營卷亦不具大抵中止矣霜早  
難熟沈觀察之言已破其蔽若慮番人疑懼



失所則今河州鎮馬廠及循化營馬廠皆在其地與番人並無形跡也豈開墾獨能啟釁乎循化遠處口外積貯爲急如年可收數萬石估給兵糧之外留備緩急豈非邊方久安長治之策哉惜乎庸人可與樂成難以慮始也屋舍牛具籽種口糧需銀約十餘萬金請帑辦理未見成效而所費已多自難爲力今新疆廢員名爲効力而實無所事事若奏明照直隸營田之例將此地渠道頃畝地方官一

循化志

卷二 山川

二十四

一勘丈量其難易多寡令廢員分段認墾著有成效或免其罪或叙以官衆擎易舉踴躍趨事三年必告成功墾戶旣多自當設官彈壓城垣倉庫衙署營房亦照循化之例令別廢員陸續分辨十年之內諸事就理矣此萬世之利也

名合贊寨川在廳治南三百五十里東西五十里南北約五里

下則蓋寨川在廳治南三百五十里東西十五里南

北約五里

黑錯寺川在廳治南二百八十里東西八里南北約  
二十里

阿卜墾寺川在廳治南二百里東西三十里南北約  
五里

循化志

卷二山川

二十五

古蹟

澆河故城在廳治西界貴德廳境內

河水又東徑澆河故城北有二城東西角倚東北去西平二百二十里宋少帝景平中拜吐谷渾阿豺爲安西將軍澆河公卽此城也

水經注

按西平今西甯府以里數考之此城當在貴德廳界然廳治以西皆古澆河郡地也故錄之

廣違城在廳西界

循化志

卷二

古蹟

二十六

河水又東北徑廣違城北

水經注

按廣違卽廣威後周置廣威縣於此蓋取此城爲名屬洮河郡至隋併入河津故址當在貴德廳界內近循化

臨津城在廳治西界

河水又東徑臨津城北白土城南

水經注

按臨津縣爲晉時張軌所置白土城疑卽今西甯之甘都堂汛臨津又在其上故址當在今查漢大寺工隆布諸寨間臨津溪水疑卽

保安大河也

消銅城 列城在廳治西南蒙古界

灑水導源塞外羌中故地理志曰其水出西塞外  
東北流歷野虜中徑消銅城西又東北徑列城東

水經注

按灑水今誤呼大夏河者也其源在廳治西  
南蒙古界知此二城亦在是矣

可石孤城 黑城 榆城在廳治南捏貢川

灑水又北逕可石孤城西西戎之名也又東北右

循化志

卷二 古蹟

二十七

合黑城溪水水出西北山下東南流徑黑城南又  
東南入灑水灑水又東北徑榆城東榆城溪水注  
之 水經注

按今土門關卽酈注之石門口其石門口以  
上所序皆今廳境也灑水所行皆在捏貢川  
則諸城亦當在捏貢川特未能實指所在耳  
河關故城在廳治西界貴德廳境內

按自漢宣帝神爵二年置河關縣至後涼呂  
光龍飛二年克河關凡四百餘年爲郡縣此

後河關遂不見於史傳而光所置之澆河郡歷代因之然則河關澆河蓋一地也光改河關縣爲澆河郡耳水經序河水東過河關縣北而酈注序河水東徑澆河故城北不言河關故城所在知其爲一地也

洮河縣故城在廳治西界貴德廳境內

按後周因南涼之澆河郡置廓州改郡名曰洮河洮河縣則其治所也是洮河縣卽澆河故城矣

循化志

卷二 古蹟

二十八

河津縣故城在廳治西界

按隋改周洮河郡爲澆河郡治河津併洮河三縣入焉是河津縣亦卽澆河故城也

米川縣故城在廳治西界

按唐移澆河郡治於化隆縣而河津縣廢貞觀五年始置米川縣爲米州治所在河之南蓋卽河津縣故址是亦卽澆河故城矣

積石州故城在廳治東積石關內河州境

按積石軍始於唐宋因之金升爲州元和志

以爲卽澆河故城非也今積石關內土人猶呼爲積石州

懷羌縣故城在廳治之南南番二十一寨界內

按宋城金升爲縣屬積石州宋志南洮州界一百七十餘里金志西至生羌界八十里知在南番諸寨界內也

譚郊城 治城在廳治東界

晉義熙七年乞伏乾歸克秦水洛城徙其民三千餘戶於譚郊因城其地八年徙都之資治通鑑

循化志

卷二 古蹟

二十九

宋元嘉六年西秦南安太守翟伯承等據罕升谷叛應河西乞伏暮末擊破之進至治城八年夏赫連定畏魏人之逼擁秦民自治城濟河欲擊河西而奪其地同上

治城其地當在黃河南 譚郊在治城西北胡三

省通鑑注

譚郊城在河州西北 治城在河州西北舊志在

州西北一百一十里 一統志

按治城距河州一百一十里當在今積石關

內譚郊又在治城西北是在今廳境內矣  
鹽泉城在廳治西

按鹽泉城亦號鎮西軍唐開元二十六年杜  
希望奪吐蕃河橋於河左築鹽泉城一統志  
謂鎮西軍哥舒翰所置者然翰置於開元三  
年與此似非一地今廳治河岸皆出鹽回民  
以爲生業而掌教坊渡口又爲津路往來吐  
蕃之河橋必在於此故知在廳治西也

循化城在廳治南土門關外

循化志

卷二 古蹟

三十

按宋之循化城卽一公城九域志謂在河州  
西南一百六十里是今土門關外清水橋溝  
一帶也

歷精城在廳治東南喬家岔關外

唵厮囉三妻喬氏居歷精城

宋史吐蕃傳

歷精城在河州西南 一統志

按宋志循化城南至下橋家族地分一百餘  
里橋卽喬也而河州二十四關亦有喬家岔  
關是必相沿舊名喬氏所居

捏剛洞在老鴉關外西南八十里

捏剛洞在河州老鴉關邊外西南八十里土人云入其中行七八日尚未盡洞內有池洞外有一泉卽藥水也 一統志青海

按此洞今人無知之者一統志必有所據錄之俟考

### 關津

積石關在河州西北一百二十里西距廳治六十里東去積石山五十里明初於州置茶馬司此爲市

循化志

卷二 關津

三十一

易之處有官軍戍守迤南有樊家硤崔家硤五臺西小路紅崖子等關 一統志

按積石山在積石關之西六十里此云東去仍前人之誤也 省志亦然

崔家硤關在河州西北一百里距廳治若干里

在州西一百五十里石榨一道 省志

樊家硤關在河州西北一百里西距廳治若干里

在河州西一百二十里石榨一道 省志

大硤關在河州西九十里西北距廳治若干里



在州西八十里石榨一道省志

按河州志無此關名而有西山小路山口數之始合二十四關之目今輿圖有之蓋卽一地也

五臺關在河州西九十里西北距廳治若干里石槽一道省志

紅崖關在河州西九十里西北距廳治若干里

石榨一道閘門一座省志

乜藏關在河州西七十里西北距廳治若干里

循化志

卷二關津

三十二

老鴉關在乜藏關南又南爲漠泥關又東南則土門關也一統志

老鴉關在河州西八十里西北距廳治一百二十里

老鴉關在州西九十里一統志

按河州至韓家集五十里韓家集至關三十里實止八十統志省志俱誤

漠泥關在河州西七十里西北距廳治若干里

土門關在河州西九十里西北距廳治若干里

在河州西南九十里迤東爲石嘴兒朶只巴般板

槐樹西兒喬家岔鴉塘等關又東則殺馬關也一  
統志

闔門一座 省志

按般板船板之訛州志謂之船船嶺

石嘴關在河州西九十里西北距廳治若干里

在州西六十里邊榨一道闔門一座 省志

朶只巴關在河州西七十里西北距廳治若干里

石榨一道 省志

船般嶺關在河州南六十里西北距廳治若干里

循化志

卷二 關津

三十三

槐樹關在河州南七十里西北距廳治若干里

闔門一座 省志

西兒關在河州南九十里西北距廳治若干里

喬家岔關在河州南八十里西北距廳治若干里

牙塘關在河州東南七十里西北距廳治若干里

沙麻關在河州東南八十里西北距廳治若干里

殺馬關在河州西南八十里林麓控搯足以守禦

自北而西舉足寢高又行一日至嶺西其地益高

元遣都實訪河源路出於此俗又名沙麻關迤東

爲思巴思關又東爲陡石關 一統志

按沙麻卽殺馬之訛牙塘在河州東南沙麻  
又在牙塘之東則統志省志謂在河州西南  
者誤也河州志但云在州南亦非

思巴思關在河州東南八十里西北距廳治若干里  
陡石關在河州東南七十里西北距廳治若干里

在河州南八十里有堡迤東爲大馬家灘關小馬  
家灘關皆有堡其南爲麻山關 一統志

邊榨一道 省志

循化志

卷二 關津

三十四

大馬家灘關在河州東南七十里西北距廳治  
里

邊榨一道 省志

小馬家灘關在河州東南四十里西北距廳治  
里

麻山關在河州東南一百四十里西北距廳治  
里

接洮州衛界又東南爲安龍關 一統志

按州志謂在州南九十里者誤

俺隴關在河州東南二百里西北距廳治□□里

按俺隴亦安龍之訛

關隘二十四處明洪武間設官一員軍五十名一年一換今裁以塘丁守把

河州志

按

國初雖以塘兵把守然各關皆有土兵分屬各土司猶不足爲防範雍正九年河州牧顧爾昌團練鄉勇九千餘人分佈二十四關藩籬鞏固乾隆四十六年撒喇回變陡入關門彼

循化志

卷二

關津

三十五

時鄉勇器械在收查民間烏鎗案內業已收銷且執事者不知有鄉勇之備承平日久事起倉猝誤未調集於四十七年辦善後案內州牧于鎰復請增製鄉勇器械稟請總督李侍堯謂鄉勇無用遂奏請裁革而鄉勇均係沿關百姓其裁革尚未知也四十九年鹽茶軍及教匪之亂防守尚藉鄉勇之力而器械總未製臨事於營中撥用猶如私設而已嘉慶四年同知成捐製烏鎗一百杆存州庫

州

二十四關團練記

欽惟我

皇上以上聖之資膺下武之運聲教四訖太和翔洽薄  
海內外罔不口枕弋說劍者蓋已歷有年所乃西  
壁藩籬煩勞

睿顧如築城以樹屏翰添兵以資彈壓凡所創舉不  
可殫述規模宏遠經理周詳曠古未有無如梟獍  
豺狼桀黠  
地大萌芽間作往歲青海曩

循化志

卷二

關津

三十六

送馮陵我疆垂賴

廟謨尅日剪滅蠢茲西逆效尤濟惡負其牛羊之力  
以跋扈於窮荒我

皇上天策勇決命將西征大軍所向電激風駟行見掃  
幕犁庭廓清海宇但師徒在外內備宜嚴謹按河  
屬地當邊陲羌番要路悉藉障蔽自西北至東南  
關口二十有四綿亘五百里類多番夷出沒青海  
之後亦有騷動此近而可徵者其分防關隘汛兵  
而外又有馬戶箭手爲數僅止千餘散布各關仍

有汛廣兵單之勢且成兵牧馬間或借資其力不無憚於從事爾昌蒞河七載洞悉情形故爾會同署協鎮張公名興持議免差以團練事上請

大中丞許公荷蒙慎重巖疆故今舉行仍舉舊來之馬戶箭手盡改鄉勇再於各關附近募民增益一時民情踴躍爭先簡閱集成一百八

十五隊每隊設隊長督陣各一人一統之又於每關選一人爲總領共計馬步鄉兵九千六百四十四人置器械備衣裝旂幟造火藥捐養廉一千三百金有奇以時揅閱嫻習武備且教之忠信爲甲冑教之禮儀爲干櫓俾其有勇知方足捍牧圉而奠家室旣成大中丞聞於

朝

制曰可從此兵民輯睦上下相安無事力南畝有事備干城此安不忘危倣古昔寓兵於農之意爲邊徼盤石苞桑之固所以克成此事者蓋由署協鎮之和衷愆愆於前更賴

上憲之明決指示於後爾昌其何力之有焉爰記

其始未勒之於石以誌不朽云

碑在州署頭門內

大清雍正九年歲次辛亥季秋之吉知河州長洲

顧爾昌

巡撫許團練卽立法垂久事照得河州地方附近番夷爲臨蘭門戶所轄二十四關乃設馬戶箭手以資防禦但日久不加訓練幾於有名無實且爲數無幾散處各關仍有汛廣兵單之勢邇者準噶爾逞獘未靖雖殄滅在卽正宜先事綢繆有備無患前經檄飭該州准行團練將馬戶箭手盡改

循化志

卷二 關津

三十八

鄉勇又於沿關一路募民增益集成隊伍統以總領隊長總計不下萬人本都院業經飭發器械該州復捐給旂幟衣裝等項定期揅演嫻習武備教以步伐止齊使之有勇知方誠可悍禦牧圉奠安家室惟是初定規模宜圖善後合行發示勒石禁約爲此示仰河屬文武官吏軍民人等知悉嗣後各關鄉勇責令該州董率訓練以收實用除防關守隘之外更無餘事至於地方文武務須各自鈐束使兵民和協彼此相安倘有吏役兵丁人等不

遵禁約生事累民者該管官立即重懲勿少姑息  
惟以保固地方安輯人民爲念此固一時盛舉實  
爲千載宏規本都院將於守土各員觀成效焉勿  
得玩違致干叅究須至告示者

雍正九年八月□日

州卷

乾隆四十六年河州鎮咨二十四關內如積石老  
鴉槐樹沙麻土門五大關尤爲入腹之門戶原設  
木柵或在山巔或憑谷口舊制大關撥弁兵數十  
名小關五六名輪流駐守查兵丁駐劄之區或近

循化志

卷二

關津

三十九

在關口或距關尚遠甚有離關一二十里及二十  
餘里不等另立營房是雖名爲防禦實不足以控  
扼而杜私越今擬除老鴉土門二關原有兵丁各  
四十名足敷防守其積石等三關於原兵外請加  
兵丁一二十名擇其高阜顯明處設卡駐巡則平  
日足以盤私越有事亦可以資捍禦其餘各關向  
來並未駐守關口今將原設之兵均令在該關扼  
要之處設卡駐守該處林木甚近即可砍伐修建  
爲費無多營中自行籌辦

營卷



按二十四關循化與河州共之者也關內爲河州關外爲循化諸關皆在循化東境及東南境今往來者皆由積石老鴉二關其餘關外之路路旣迂遠又經番寨必入積石老鴉二關經河州境乃至各關故其道里不得而詳今惟據河州志書距州里數然其中亦有錯謬未可以爲定矣

乙麻木莊官渡亦謂之掌教坊河口渡在廳治西北十五里赴甘都堂堡及巴燕戎格西甯府有官船亦循化志

有木窪

卷二 關津

四十

初立營時胡遊擊璉造船一隻挪用銀三十八兩六錢其後追賠

營卷

乾隆四十六年撒拉軍需舊船破損不堪用同知洪彬造船一隻以通文報運麪觔軍器用銀一百兩零未准提銷夫頭七名水夫六十三名責水夫等隨時脩補

廳卷

草灘壩莊渡在廳治北里許赴河北加如莊清水工渡在廳治東十里赴河北阿麻岔莊

孟打工渡在廳治東四十里赴河北磚塘莊

木廠莊渡在廳治東六十里積石關西二里赴河北

碾伯縣地方並鴻化靈藏二族

古什郡莊渡在廳治西五十里

查汗大寺工渡在廳西四十里 蘇只工渡在廳治

西三十里三處俱赴巴燕戎

別列渡莊 定匠莊渡俱在廳西十里 石頭坡莊

渡在廳治西六里三處俱赴河北牧牲取柴

按以上十處渡口俱無船用木窪以整木大

循化志

卷二 關津

四十一

一圍有餘者爲之長可八尺其上挖槽人坐  
其中深廣約俱二尺水溜急處滾轉波浪中  
頗危險然頭尾各有孔以椽本貫之或兩或  
三聯爲一如棧亦安穩也行水以木鋏划之  
甚速

隆窩橋在土門塘廳治東五里下跨山水未詳何年  
建現在重修

廣濟橋在清水工廳治東十五里下跨起臺溝水未  
詳何年建今毀倚山修小木橋一座

隆務橋在保安堡廳治西南一百五十里下跨保安  
大河未詳何年建

江什加橋在廳治西一百六十五里

多哇橋在廳治西一百七十五里

朶什濟橋在廳治西一百八十里

宗卡橋在廳治西二百里

清水橋在土門關外廳治南一百九十里下跨灘水  
料堆橋二座在廳治南二百里上下

黃年橋在廳治南二百二里

循化志

卷二 關津

四十二

橋溝橋在廳治南二百一十里

觀音橋在廳治南二百二十里

城池

循化廳土城一座周圍長六百八十丈東西一百二十面各長一百二十面各

丈南北二十面各長二百二十丈高二丈二尺一根厚二丈收頂一丈七尺五寸

雍正八年原任翰林院編修張縉効力建

雍正七年閏七月河州知州顧詳七月二十六日同蘭州營張自河州出老鴉關勘得離老鴉關一百六十里有草灘壩一處其西南一百五十里則爲上龍布正西八十里則爲下龍布其東八十里俱係撒喇地方接連起臺堡實爲番回適中之處

循化志

卷二 城池

四十三

其地周圍二十餘里南面大山北臨黃河河北亦有大山係西甯所屬其間地勢平衍山水環抱風和氣聚土脉又甚堅厚開渠引水亦屬便利可以建築城垣職等悉心相度城垣周圍三里一分零坐艮向坤開設東西二門足容官兵駐北需用木植在上龍布白佛僧番子地方有大林木離建城處約二百餘里從河紮筏順流而下可至工所磚瓦石灰石條石柱等項僱募匠役前赴彼地俱可就近燒運其建築城垣修造官署兵房木植人工

匠役需用器具各照實估計約需銀四萬二千三百餘兩另繪圖造冊申報但草灘壩建成之處有回民耕熟之地約百餘畝現在河廳納糧其地自應給價除糧度使回民無累

州卷

八月甯遠大將軍岳咨張縉係奉

旨於川陝沿邊派修城垣一處効力贖罪今撒喇地方現在議修城池營房擬合移咨轉飭張縉自備資財前往河州口外撒喇地方實心辦理城垣効力

贖罪

州卷

循化志

卷二 城池

四十四

按張縉陝西韓城縣人其具呈稱原任翰林院左中允而甘撫題疏稱原任翰林院編修蓋翰詹兩衙門原有兼銜也

十年閏五月布政司詳大署司查河州口外新設循化營應建城垣衙署廟宇兵房一千六百間并保安堡添修守把二員衙署及兵房四百間二處所需工料等項經詳委署河州協并河州公勘估報續委鞏昌糧茶通判方可式前往監修其所需銀兩奉文着落原任翰林張縉自備資財効力贖

罪在案今張縉將工程建修告竣又情愿報捐銀三千兩爲新兵搬家之需據河州廳協鞏糧廳收具張縉造報用過工料銀兩清冊並循保二營造報給□兵丁搬家各冊查冊造建修循化營城垣衙署兵房廟宇等項共用過銀四萬四千八百六十六兩零又修保安衙署兵房等項共用銀五千一百九十九兩零二共用銀五萬六十五兩零搬家報銷銀三千兩除循化營散給銀一千一百五十八兩零保安堡散給銀一百二十兩零二共用

循化志

卷二 城池

四十五

銀一千二百七十九兩零尚餘銀一千七百二十兩零已據鞏糧廳起解司庫聽候撥用所有蘭州廳王安仁奉委勘用取獲保固印結並鞏糧廳董朝佐取獲營員領散兵丁盤費各結應同送到冊一併呈齎 巡撫批仰候會 題 營卷

按教場亦張縉所修牌文有之司詳不具蓋畧之也此案雖委洮岷道吳可偉監修而實未到工監修者鞏昌糧茶通判方可式及署河協副將張興老營卷八年二月動土城垣

廟宇衙署本年卽告竣其營房至九年九月  
始竣工云

遊擊胡璉建城記雍正九年歲在辛亥以河湟關  
外撒喇地方新設營汛特奉

簡命估修城池告竣於是闔營屬員兵丁請余勒石以  
記之余惟經國之模莫大於防邊而守邊之道莫  
要於建城番性難制我進則彼退我去則彼來以  
無定之行踪而與之騁逐沙漠雖制勝於一時非  
計之得者也欽惟我

循化志

卷二 城池

四十六

皇上御極十年化治中外間有邊寇竊發則出師征討  
旋發帑建城以嚴保障謂番人水草爲宅出沒無  
常城池一建則土地漸闢彼無所恃之利自將潛  
踪歛跡所謂裒旅截所不戰而自屈者也撒喇僻  
處河州西界番回雜處土俗驕悍保安堡雖設守  
脩彈壓而營堡守兵仍屬番族部落以致土千戶  
王喇夫旦得挾其所恃漸肆猖蹶我

皇上特允少保公岳題請遣河協副將冒爲統師大通  
叅將馬爲截殺鎮標左營遊擊李爲監軍分兵進

剿直抵巢穴生擒土千戶王喇夫旦而境以清又念保安彈丸蕞爾不足以樹威邊塞更議內地募卒去其番卒增其式廓適原任翰林左春坊左中允張自以世受

國恩欲圖報効詳請捐修奉

旨以其事付之大中丞擇僚才能者三人俾襄厥事時則有若洮岷道吳署河協張鞏糧廳方相率協力而工匠夫役亦皆趨事甫一載百堵皆興而凡官弁衙署兵民營舍俱以落成大部奏請

循化志

卷二 城池

四十七

欽賜佳名循化特設遊擊一員千總一員把總二員馬步兵八百名鎮撫其地一時聲靈所布頑梗歸心德化所孚禎祥畢至自積石至插漢打思河清百里一洗撒喇濁穢河州牧顧目覩瑞兆由請各憲疏

聞命於城北建立龍神廟宇以應天休而撒喇之役遂垂不朽之宏功焉余以西蜀武弁謬爲制憲器使由四川署副將管建昌鎮會鹽營遊擊事調補茲土自愧謏劣無能翊贊高深幸勒貞岷聊述一



二是爲記時雍正十年歲在壬子仲秋桂月穀旦  
碑在叅將署

按插漢打思卽查漢大寺工也語音之訛耳

保安堡土城一座周圍長六百八十四丈

東西二百

二十四丈南北二面高二丈五尺

根厚二丈

明時建

保安堡在河州西三百五十里有城明置保安站  
及保安操守所

本朝設守備 一統志

按城之建不知何時聞其初乃脫屯之堡也

循化志

卷二 城池

四十八

明初設官置兵脫屯之人始散處城外又舊  
冊載周圍長三百四十二丈與今異其後當  
又增築亦未詳何時云

起臺堡土城一座周圍長一百九十二丈

東西二面

二丈南北二面高四丈

根厚三丈

用時建東門外關

廂三面長一百四十丈高一丈二尺

根厚五尺

乾隆

五年奉文添建

起臺堡在河州西一百五十里有□□萬歷年修

築周圍一百六十丈高三丈五尺設專備駐防

□志

按營卷明末流賊猖獗因無聯絡營汛守備脫凡移住口內之雙城堡康熙十一年河協副將陳建惺檄查守備馬文廣覆以往來遊巡駐防自是輾轉相沿至乾隆三年尚寄房雙城也總督查題奏奉部文起臺堡守備令其仍歸起臺原汛住劄其堡城窄小准於舊堡之外接築關廂建造衙署兵房地方官確佑造報而堡城四面皆有壕溝難以接築惟東門外關帝廟傍有古地一段順二十六丈

循化志

卷二 城池

四十九

橫八丈又有塌捐小墻可以添補五年三月河州知州劉鶴鳴臨勘就地勢連築於三月十六日興工並建守備衙署一所演武廳一座兵房一百一十八間蘆草灣等塘房七處閏六月告竣守備於四年五月帶兵歸起臺原汛駐札其雙城舊署呈交鎮憲行該管汛員查收